

**Meeqqat atuarfiani klassimi ataatsimi annerpaamik 18-inik atuartoqarnissaanik qulakkeerisumik inatsimmik atortuulersitsinissamik, Naalakkersuisut peqquneqarnissaannik Inatsisartut aalajangiiffigisassaattut siunnersuut.**

*Demokraatit inatsisartuni eqimattaanit saqqummiunneqartoq*

aamma

**3. aamma 7. klassimi alloriarfinni allattariarsornermi pinngitsuugassaannigitsunik misilitsissutunik qitiusumit aalajangersarneqartunik atorunnaarsitsissallutik inatsisinut, malittarisassanullu allannguutunik pisariaqartunik saqqummiussinissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisit, malittarisassallu ukiumi atuarfiusumi 2027/28-mi atuutsilersinneqarsinnaanngorlugit naammassineqassapput.**

*Demokraatit inatsisartuni eqimattaanit saqqummiunneqartoq*

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap**

**siunnersuutip aappassaaneerneqarneranut**

**ISUMALIUTISSIISUTAA**

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimsen, Inuit Ataqatigiit, siulittaasoq

Inatsisartunut ilaasortaq Isak Johannessen, Naleraq, siulittaasup tullia

Inatsisartunut ilaasortaq Margrethe Thårup Andersen, Demokratiit

Inatsisartunut ilaasortaq Karen-Marie Kyed Frederiksen, Demokratiit

Inatsisartunut ilaasortaq Nivi Rosing, Inuit Ataqatigiit

UPA2026-mi ulloq 4. maj 2026 siullermeerinerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Immikkoortoq 64 aamma immikkoortoq 143 ataatsimoortillugit siullermeerneqarput. Immikkoortut marluk imminnut qanipput meeqqallu atuarfeqarfiinut tunngassuteqarlutik.

UPA2026/64 pillugu

Meeqqat atuarfiani klassimi ataatsimi annerpaamik 18-inik atuortoqarnissaanik qulakkeerisumik inatsimmik atortuulersitsinissamik, Naalakkersuisut peqquneqarnissaat siunnersuummi siunertaavoq.

UPA2026/143 pillugu

3. aamma 7. klassimi alloriarfinni allattariarsornermi pinngitsuugassaannngitsunik misilitsitsissutinik qitiusumit aalajangersarneqartunik atorunnaarsitsissallutik inatsisinut, malittarisassanullu allannguutinik pisariaqartunik saqqummiussinissaanik, Naalakkersuisut peqquneqarnissaat siunnersuummi siunertaavoq. Inatsisit, malittarisassallu ukiumi atuarfiusumi 2027/28-mi atuutsilersinneqarsinnaanngorlugit naammassineqassapput.

**Siunnersuutip Inatsisartuni siullermeerneqarnera**

Siunnersuutit siullermeerneqaramik annertuumik isumaqataaffigineqarput kiisalu meeqqat atuarfeqarfii oqallisigineqangaatsiarlutik. Atuartunut ilinniartitsisinullu sinaakktissat eqqortut qulakkeerneqartariaqarneri annertut oqaatigineqartarpoq. Ilutigisaanik meeqqat atuarfeqarfiisa nunatsinni pissutsinut tulluarsartariaqarneri erseqqissaatigineqarpoq, nalinginnaasumillu isumaqatigiissutigineqarluni meeqqat atuarfiinut inatsit iluarsisariaqalersimasoq.

UPA2026/64 pillugu

Illoqarfinni nunaqarfinnilu sulisussarsiniartarnerit sulisussaaleqisarnerillu kiisalu siunnersuutip aningaaticut kingunerisassai pillugit unammillernartut ernummatigineqarput. Tamatuma saniatigut eqqartorneqartut ilaat tassaavoq, klassimi 18-it inorlugit atuortoqartuni aaqqiissutissanik aamma nassaartoqartariaqartoq. Tassunga atatillugu erseqqissaassutigineqarpoq siunnersuutip pitsaaqutai akornutaalu qulaajaavigineqarnerusariaqartut.

UPA2026/143

Ataavartumik malitseqartitsisarnissaq siunertaralugu atuartut angusaasa allattugaatigineqarnissaat pisariaqartoq. Naggataatigillu naqissuserneqarluni soqutigisaqaqatigiit attuumassuteqartut immikkullu ilisimasallit suleriaqqinnissamut peqataatinneqartariaqartut.

Immikkoortup siullermeerneqarneranut atatillugu Naalakkersuisut ima allannguutissatut siunnersuummik saqqummiussipput:

”Naalakkersuisut suleqatigiissitamik meeqqat atuarfiannik sullissisunik pingaaruteqartunik amerlasuunik ilaasortalimmik pilersitsinissaannut Inatsisartut aalajangiinissaannut siunnersuut. Suleqatigiissitaq klassini atuaqatigiit amerlassusaannik pisariaqartitsiviusuni ikilisitsivinnissamut periarfissanik qulaajaassaaq kiisalu maannakkut alloriarfinni misilitsittarnerit, ilikkagaqarniarnermut ikorfartuutaanerulernissaat siunissami anguniarlugu, perorsaanermilu iluarsivigineqarnissaannik atuinermut imaluunniit atorunnaarsinneqarnissaannik misissueqqissaarlunilu siunnersuutunik saqqummiussissaaq. Sulineq inatsisunik maleruagassanillu allanngortitereratarsinnaanermut tunngaviliissaaq, suleqatigiissitarlu UKA2027-mi nassuiaammik saqqummiussissalluni.”

Immikkoortup siullermeerneqarneranut atatillugu Siumumeersut ima allannguutissatut siunnersuummik saqqummiussipput:

“Naalakkersuisut suleqatigiissitamik meeqqat atuarfiannik sullissisunik pingaaruteqartunik susassaqtut aamma kattuffiit kommuunillu peqataatillugit pilersitsinissaannut Inatsisartut aalajangiinissaannut siunnersuut. Suleqatigiissitaq klassini atuaqatigiit amerlassusaannik pisariaqartitsiviusuni ikilisitsivinnissamut periarfissanik qulaajaassaaq, perorsaanikkut aningaasatigullu kingunerisassai ilanngullugit, atuartitsinerup pilersaarusiortarnerani eqaannerulersitsinissamik nalilersuissaaq kiisalu maannakkut alloriarfinni misilitsittarnerit, ilikkagaqarniarnermut perorsaanermilu atuinermut ikorfartuutaanerulernissaat anguniarlugu, iluarsivigineqarnissaannik imaluunniit atorunnaarsinneqarnissaannik misissueqqissaarlunilu siunnersuutunik saqqummiussissaaq. Sulineq siunissami inatsisunik maleruagassanillu allanngortitereratarsinnaanermut tunngaviliissaaq, nassuiaammik saqqummiussissalluni. Saqqummiussassaaq UKA27-mi saqqummiunneqassaaq.”

Qulaani allassimasut tunngavigalugit immikkoortut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut suliarineqartussanngorlugit innersuunneqarput.

### **Siunnersuutip aningaasatigut kingunerisassai**

#### UPA2026/64 pillugu

Inatsisartut suleriaasianni § 33, imm. 1, allaqqavoq siunnersuut tunngavilersugaassasoq siunnersuutillu aningaasatigut allaffissornikkullu kingunerisinnaasai allaaserineqarsimassasut.

Siunnersuut piviusunnigortinneqassappat aningaasatigut kingunerisinnaasai ukiumut 33,7 mio. kr.-it missaaniittassasut siunnersuummi matumani allaqqasoq ataatsimiititaliamit maluginiarneqarpoq.

#### UPA2026/143 pillugu

Inatsisartut suleriaasianni § 33, imm. 1, allaqqavoq siunnersuut tunngavilersugaassasoq siunnersuutillu aningaasatigut allaffissornikkullu kingunerisinnaasai allaaserineqarsimassasut. Siunnersuutip piviusunnigortinneqarnerani atorfilittap ukiumut akissarsiaasa 500.000 koruunit qaangerneqarnissaat naatsorsuutigineqanngilaq siunnersuummi allassimasoq ataatsimiititaliamit maluginiarneqarpoq.

#### **Ataatsimiititaliap siunnersuummut oqaaseqaatai**

Siunnersuutit klassimi atuartut amerlassusiisa aalajangersarneqarnissaanut aamma 3. aamma 7. klassimi alloriarfinni misilitsitsissutit atorunnaarsinneqarnissaannut tunngassuteqarput. Atuartut ilikkarniartarnerinut pitsaanerulersitsinissaq ilinniartitsisullu taakkununga ukkatarinninnissaannut periarfissaqalernissaat siunnersuutini taakkunani marlunni siunertarineqarput.

#### UPA2026/64 pillugu

Klassit atuartukinnerulerneratigut perorsaanermik tunngavissat eqqarsaatigalugit iluaqutaasinnaanera pillugu Naalakkersuisut isumaqataanerat aammalu klassimi atuartut ikinnerulersinniarneqarnissaannut ineriartortoqarnissaa pitsaasutut isigineqartoq ataatsimiititaliamit maluginiarneqarpoq. Klassit atuartunik amerlanerpaanik atuartullit illoqarfinni anginerni ajornartorsiutaasoq – pingaartumik Nuummi, maluginiarneqarpoq, aammalu nunap immikkoortuisa sinnerini atuarfinni amerlanerpaani klassini atuaqatigiit 18-ioreerput taakkualuunniit ataallugit amerlassuseqareerlutik. Peqatigisaanik maluginiarneqarpoq Kommunalbestyrelsit atuartut najukkaminni ikilisinneqarnissaannut klassini atuaqatigiit amerlassusaanik ikilisisillutik aalajangersaanissaminnut periarfissaqareertut, kisiannili atuartut 18-iunissaat ersarissumik aalajangersarneqarnikuunani.

Naalakkersuisut allannguutissatut siunnersuutaat akuerineqassappat suleqatigiissitaq klassini atuaqatigiit amerlassusaanik pisariaqartitsiviusuni ikilisisivinnissamut periarfissanik qulaajaassaaq.

#### UPA2026/143 pillugu

Misilitsinnerit ullumikkut annertuumik uuttuiniutitut aammalu atuarfiit akornanni piffissallu ingerlanerani sanillersuussissutitut atorneqartartut ataatsimiititaliamit maluginiarneqarpoq, aammalu uuttuiniutitut atorneqarnerisa atuuffissaraluisa siunertaat allanngortillugu, misilitsissutit taamaallitut ilikkariartorneq pinerunagu taamaallaat uuttortaanermut

atorneqarnerulersinnaallutik. Ilutigisaanik ataatsimiititaliamit maluginiarneqarpoq Naalakkersuisut misissuinerni taakkunani Public Expenditure Review (PER-rapport-imi) paasisat suliniaqqinnerminni ilanngunniaraat siunissamilu atuarfeqarnerup malittarisassaajumaartussanullu ilanngunneqarumaartut.

Naalakkersuisut allannguutissat siunnersuutaat akuerineqassappat inatsimmi maleruagassanilu allannguutit ukiumi atuarfiusumi 2027/28-mi atuutilernaviangillat, parlattuanilli UKA2027-mut nalunaarusiamik saqqummiussisoqassalluni, taannalu siunissami inatsisunik maleruagassanillu allanngortitereratarsinnaanermut tunngaviliissaaq.

#### Nalinginnaasumik

Ataatsimiititaliamit maluginiarneqarpoq Naalakkersuisut allannguutissat siunnersuutaat klassini atuaqatigiit amerlassusaat alloriarfinnilu misilitsittarnerit pillugit ajornartorsiutinut toraarnerusumik sammitinneqartoq, naak Siumut allannguutissat siunnersuutaanni periuserineqartussaq siammasinnerugaluartoq kiisalu atuartitsinerup pilersaaruserineqartarneri ilanngunneqarlutik aammalu aningaasatigut perorsaanikkullu kingunerisassai ilaatinneqarlutik. Taamaattumik Naalakkersuisut allannguutissat siunnersuutaat suleqatigiissitap suleriaqqinnissanut erseqqinnerusumik suliassatigullu ukkatarinninnerusumik qulakkeerinnittussat ataatsimiititaliamit nalilerneqarpoq.

Naalakkersuisut allannguutissat siunnersuutaanni nalunaarusiornissamut siunnersuutigineqartoq klassini atuaqatigiit amerlassusiinik annikillisaanissamut periarfissanik qaammarsaanissaq alloriarfinnilu misilitsittarnerit atorunnaarsinneqarnissaannut siunnersuutaasoq suleriaqqinnissamut naleqquttumik toqqammaviliisoq ataatsimiititaliap nalilerpaa.

## **Ataatsimiititaliap inassuteqaatai**

### Immikkoortoq 64 pillugu

- Ataatsimiititaliami amerlanerussutillit, Demokraatineersut aamma Inuit  
Ataqatigiinneersut, Naalakkersuisut allannguutissatut siunnersuutaat  
akuerisassanngorlugu inassuteqaatigaat.

### Immikkoortoq 143 pillugu

- Ataatsimiititaliami amerlanerussutillit, Demokraatineersut aamma Inuit  
Ataqatigiinneersut, Naalakkersuisut allannguutissatut siunnersuutaat  
akuerisassanngorlugu inassuteqaatigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Nivi Heilmann Efraimsen  
Siulittaasoq

---

Isak Johannessen  
Siulittaasup tullia

---

Margrethe Thårup Andersen

---

Karen-Marie Kyed  
Frederiksen

---

Nivi Rosing